

1 Pedru

Īsazei'wa norī ma, Pedru te te ĩrob'ui'éré na'rata zé

Ībaihâ wasu'uzé

Ā ĩbaihâ hã Pedru te te ĩrob'ui'éré hã Zezusihi zazei'wa norī hã daro mono bâ 're ĩsi'ubumroi mono norī ma, ma tô rob'ui'éré, ĩsazei'wa 're nomro mono 'ru te, da te tâma 're ĩrob'manharī za'ra mono norī ma. Īsazei'wa norī hã danhib'rata te te 're robzépata za'ra mono wa, ma tô Pedru hã tinhimi'ui'éré na pê'êhiri za'ra. Taha na ma tô pawaptob za'ra, siptete sina Zezusihi âma si 're nomro mono da. Cristu hã wanhowa te te ĩrobzépata na hã ma tô duré tâma waihu'u za'ra, duré wa norī hã ĩsiré 're wanomro mono wa, za ĩsine wa te 're ĩrobzépata za'ra mono zém na hã. Āne ma tô duré tâma waihu'u za'ra: 'Re ĩhâimana u'âsi mono hã ma tô te te 're aipibu za'ra wa'wa, tô sena 're umnhasi za'ra wa'aba mono zô.

1 ¹ Wa hã Pedru, Zezu Cristu te te ĩpisudu, ĩsadawa wasu'u'wa 're ĩmorī da. Āhãna wa za âma aima rob'ui'éré za'ra wa'wa, 'Re ĩhâimana u'âsi mono nhib'a'uwē norī ma. Airom nhiti te dawazari 're aihâimana za'ra wa'aba mo, danhipti'a nho'ômo mono bâ, Pôtu âma, duré Darasiza âma, duré Capadosiza âma, duré Azi'a âma, duré Bitinha âma. ² Aipoto za'ra wa'aba ô ré, ma tô Wamama hã sima aipisutu sirômo za'ra wa'wa, 'Re ĩhâimana u'âsi mono hã, ĩsib'a'uwē oto 're anomro aba mono da. Taha da, ma tô oto Tip'êžani hã aip'ê 're aima sômri za'ra wa'wa, aiwē uptabi na oto ôhō âma si 're anomro aba mono da, duré Zezu Cristuhu nhimiroti si 're wapari pese za'ra wa'aba mono da, duré Cristu hã dazada ĩdâ'âzéb zarina, aip'ê 're te te 're ai'a'upsōi wa'aba mono wa, aiwasété âna âma 're anomro aba mono da oto.

'Re ĩhâimana u'âsi mono ma, wa ai'âma 're ĩmreme u'âsi za'ra wa'wa, ĩsimizawizé hã ai'âma 're hâimana u'âsi za'ra wa'aba mono da, rowē u'âsi, âma 're anomro aba mono da, taha âma si.

Rowē uptabi zô, 're ĩdanhimipari za'ra mono zé wasu'u

³ 'Re ĩhâimana u'âsi mono âma si oto 're wawata u'âsi za'ra wa'aba mono, Wanhib'apito Zezu Cristuhu mama âma. E marī wa. ĩp'êžézé hã sa'êtē na tâma 're hâimana mono wa, ma tô wa'apoto té, wap'ê 're, wahâimanazép té ĩwē na si oto âma 're wahâimana

za'ra mono da. Zezu Cristu hã dâ'â uptabi nherẽ, ma tô Ìmama hã ab're hawi hãiwawutu, tiwaihu'u pese na. Taha zarina, wa za duré wasina sô 're wanhimipari za'ra, 're wadâ'â za'ra mono pari, te te 're ïwa'ahãiwawutu mono zéb zô. **4** Nimahã na, te za marĩ hã ïwẽ hã te te wama 're anhomri, tinhib'a'uwẽ norĩ zô te te 're ï'ab'madâ'â mono hã hãiwawãma. Tame ïwẽ uptabi si te asô 're simi'wara u'âsi 'wa, dawĩ 're ïsi'utõrĩ waihu'u za'ra mono õ hã, dawĩ 're ïwasété za'ra mono õ hã duré. **5** Ate za'ra wa'aba da, te ïwẽ hã asô 're hãimana u'âsi za'ra wa'wa. A norĩ wa'wa hã ïwaihu'u pese na te oto asina 're ï'umnhasi za'ra wa'aba mo. Taha wa, te za ïwasété wi te te 're ai'madâ'â pese za'ra wa'wa, asõ'reptui wa'aba zé hã asina uwaimrami za'ra wa'aba da, ro ïsi'utõrízéb ãma.

6 Taha wa, te za ïwasu'uwẽ zarina aipẽ'ẽ 're, 're atoi u'âsi za'ra wa'aba mo, rowasédé hã asada 're hãimana za'ra wa'aba mono wa, 're robzépata za'ra wa'aba mono nherẽ. **7** Wanhib'apito umnhasi sina 're aihãimana za'ra wa'aba mono zô, te za rowasédé hã asada 're hãimana za'ra wa'wa. Wanhib'apito Zezu Cristuhu ma, wẽ di, Wanhib'apito umnhasi sina 're aihãimana za'ra wa'aba mono zé hã. Ëtẽ'ubuzi pré oru hã dama ïsawi pese zém nhipai u, tãma wẽ di. Ëtẽ'ubuzi pré oru hã wa'ábã za'ëtẽ wa, dama sawi pese di, ta hã dama 're hãimana u'âsi mono dai õ nherẽ. Zata õ zô, te za unhama wa hiri ni, zata õ wa, da te ïwaihu'uzéb da hã, oru uptabi na. Tane, a norĩ wa'wa hã rowasédé hã asada 're hãimana za'ra wa'aba mono nherẽ, Wanhib'apito umnhasi sina 're aihãimana u'âsi za'ra wa'aba mono wamhã, apã wei morĩ wapsi, te za danho'a ai'ãma tiwata za'ra wa'wa, õhõ umnhasi sina ãma 're ï'aihãimana u'âsi za'ra wa'aba mono zém na. Tame te za duré marĩ hã ïwẽ hã aima sõmri za'ra wa'wa. Rowẽ uptabi hã te za duré aima pisutu za'ra wa'wa. Tawapsi, aima 're rowẽ uptabi za'ra wa'aba mono di za oto. **8-9** A norĩ wa'wa hã atõmo na asiwi 're 'madâ'â za'ra wa'aba mono õ di, Zezu Cristu hã. Tane nherẽ, aima sawi uptabi za'ra wa'aba di, Wanhib'apito hã. Atõmo na asiwi 're 'madâ'â za'ra wa'aba mono õ nherẽ, te Wanhib'apito umnhasi sina 're aihãimana za'ra wa'aba mo. Taha wa, aima 're rowẽ za'ra wa'aba mono wa, te aipẽ'ẽ 're, 're atoi u'âsi za'ra wa'aba mo, ato za'ëtẽ za'ra wa'aba na. E marĩ wa. 'Re aihãimana wasété za'ra wa'aba mono zém hawi, te te 're asõ'reptu za'ra wa'aba mono wa. Taha da, te Wanhib'apito hã asina 're ï'umnhasi za'ra wa'aba mo, te te 're asõ'reptu za'ra wa'aba mono da.

10 Duréihã aibã norĩ hã te 're hãimana za'ra, 'Re ïhãimana u'âsi mono zadawa wasu'u 'rata 'wa hã. Ta norĩ hã danho'reptuzé wasu'u te te waihu'u pese za'ra da, ma tô te te sô 're rosa'rata za'ra. Ìwana ré ma tô te te dama 're rowasu'u sirõmo za'ra, danho'reptuzém na, 'Re ïhãimana u'âsi mono za te te aima ãma 're ï'a'uwaimrami za'ra

wa'aba mono zém na. ¹¹ ãne te ta norĩ hã te te sima 're nharĩ za'ra: "E 'wa hã, Danho'reptui'wa za. E niwa te za tawamhã te te 're da'anho'reptu." ãne te ta norĩ hã te te sô 're rosa'rata pese za'ra, te te waihu'u za'ra da. Cristuhu pẽ'ẽzani hã ipẽ'ẽ 're, 're hâimana za'ra mono wa, ma tô tãma waihu'u sirômo za'ra, Cristu hã za te te ïrobzépatazém na. Taha pari, rowẽ uptabi hã hâiwa ãma za tãma 're ïhâimana mono na ma tô duré tãma waihu'u sirômo za'ra. ¹² 'Re ïhâimana u'âsi mono, ma tô duré ãne hã tãma waihu'u sirômo za'ra: "Aima wa'aba si, te waihu'u za'ra wa'aba ô di, danho'reptui'wai wasu'u hã. Ai'uirĩ na wa'aba, za 're ïdahâimana za'ra mono norĩ pibu ma, wa tô ãne hã aima waihu'u sirômo za'ra wa'wa." ãne ma tô tãma waihu'u za'ra, aipibu ma za'ra wa'aba zama. Wanhib'apito zadawa wasu'u'wa norĩ hã ma tô oto rowasu'uwẽ na aipo're pu'u za'ra wa'wa, Cristu te te 're ïda'anho'reptui mono zém na. Hâiwa hawi, Wanhib'apito pẽ'ẽzani nhimipawaptobzéb zarina, tô sena Cristuhu wasu'uwẽ na ma tô aipo're pu'u za'ra wa'wa. Taha wasu'u hã wẽ uptabi wa, te oto hâiwa ãma romhuri'wa norĩ hã te te sima 're wẽ uptabi za'ra, te te 're waihu'u pese za'ra mono da.

**'Re ïhâimana u'âsi mono, dahâimana wẽ da,
te te 're ïda'apisutu mono zé wasu'u**

¹³ Zezu Cristu hã nimahã na te za wei mo apã. Taha wa, te za aihâimana nhimiza'rese 're aihâimana za'ra wa'aba mo. Aihâiba na te za 'rãwi 're asi'madãã za'ra wa'aba mo. Zezu Cristu hã apã wei morĩ wapsi, te za aima 're ïrowẽ za'ra wa'aba mono zé hã aima pisutu za'ra wa'wa, hâiwa ãma. Taha zô si te za asina 're asimipari u'âsi za'ra wa'aba mo. ¹⁴ Taha wa, te za 'Re ïhâimana u'âsi mono nhimiroti hã 're ïwapari pese za'ra wa'aba mo. ïsimiroti hã 're waihu'u za'ra wa'aba mono ô ré, ma tô marĩ hã ïwasété zô si 're ïrowasutu za'ra wa'aba mo. Taha zarina 're anomro aba mono ô di za oto. ¹⁵ 'Re ïhâimana u'âsi mono hã ma tô sima aipisutu za'ra wa'wa, ïsib'a'uwẽ si oto 're anomro aba mono da. Ta hã hâimana wẽ uptabi na, te 're hâimana. Taha wa, te za a norĩ wa'aba zama, aihâimana wẽ uptabi na oto 're aihâimana za'ra wa'aba mo, ïsine. ¹⁶ Duréihã ma tô ãne siwasu'u, 'Re ïhâimana u'âsi mono hã:

"Wa hã ïhâimana wẽ uptabi na, wa 're ïhâimana. Taha wa, a norĩ wa'aba zama te za aihâimana wẽ uptabi na 're aihâimana za'ra wa'aba aba mo, ïsine."

ãne ïsimiroti na rob'ui'ééré, ïbaihã na hã.

¹⁷ A norĩ wa'wa hã, 'Re ïhâimana u'âsi mono ma 're aimreme zusi aba mono wamhã, Wamama na te 're ïsisi za'ra wa'aba mo. Ta hã dahâimanazéb zarina da'ãma rowairébé'wa, te 're hâimana. ãhã wa, 're ïdahâimana za'ra mono zéb zarina, te za dahâiba mono bã

te te dama ãma 're a'uwaimrami, dahâimana wẽ zém na, dahâimana wasété na zama. Taha wa, te za 're ìhâimana mono zém na asiwi 're ìwazéb za'ra wa'aba mo, Wamama hã, ti'ai ãma 're anomro aba mono ré. **18** A norĩ wa'wa hã ma tô ìwaihu'u za'ra wa'wa, aiwa'âbâ za'ra wa'aba zé hã. Cristu hã ma tô aiwa'âbâ za'ra wa'wa, 're anomro wasété aba mono zém hawi, te te 're asõ'reptu za'ra wa'aba mono da, aih'i'rata norĩ ne, 're aihâimana za'ra wa'aba mono tõi da oto. E rob'ui'prazém na ma tô Cristu hã aiwa'âbâ za'ra wa'wa, e êtẽ'ubuzi pré oru na, niha wamhã, e ì'a na prata na. Mare di. Ta hã wẽ u'âsi 're hâimana za'ra mono õ di za. Taha na te te aiwa'âbâ za'ra wa'aba õ di. **19** Dazada ìdâ'ázém na si ma tô aiwa'âbâ za'ra wa'wa, ìwapru hã tiwi ìpu'uzém na. Ta hã te 're mo, pone'ërebâ ìwẽ uptabi ne, da te dasiwi ìwĩrĩ da hã, dawasété wa, dawa'âbâzéb da. Cristu hã wẽ uptabi na 're ìhâimana mono hã ma tô tidâ'ázém na aiwasédé hã wa'âbâ za'ra wa'wa. Ta hã te te ìwawa'âbâ za'ra zé hã wẽ uptabi di. **20** 'Re ìhâimana u'âsi mono hã te te ro'apoto mono õ ré, ma tô Cristu hã pisutu siro, dazada dâ'â da, dawasété wa'âbâzéb da hã. ãhãna ro ìsi'utõrĩzéb u hã, ma tô we datême wi oto Cristu hã, aima ãma 're ìrowẽ za'ra wa'aba mono zéb da hã. **21** Cristu hã dâ'â uptabi nherẽ, ma tô ab're hawi hâiwa'utu, 'Re ìhâimana u'âsi mono hã, rowẽ uptabi te te tãma pisutu da, hâiwa ãma. ãhã wasu'u hã aima waihu'u pese za'ra wa'aba wa, te oto õhõ si asina 're ì'umnhasi za'ra wa'aba mo, te te dama ìropisutuzé hã te te aima ãma u'waimrami za'ra wa'aba da.

22 Wanhib'apito nhimiroti hã, tô sena. A norĩ wa'wa hã ma tô ìsimiroti hã 're ìwapari pese za'ra wa'aba mo. Taha wa, marĩ ìwasété na asima 're rosa'rata za'ra wa'aba mono õ di oto. Aiwẽ na 're anomro aba mono da si, te oto asima 're ìrosa'rata za'ra wa'aba mo. Dazawizé hã tô sena te oto aima 're hâimana za'ra wa'wa, asiré Wanhib'apito zazei'wa norĩ ãma. Taha wa, te za õne u'âsi 're asisawi pese za'ra wa'aba mo. **23** 'Re ìhâimana u'âsi mono zadawa wasu'u hã pire na te 're hâimana u'âsi. Niwa si'utõrĩ waihu'u õ di za. Ta hã ma tô oto timreme na aipoto téb za'ra wa'wa aipẽ'ë 're, ì'ra si oto 're anomro aba mono da. Ti'ai ãma damama norĩ si te za nimahã na dawi 're si'utõrĩ za'ra. Tanei õ di, Aimama 'wa hã aipẽ'ë 're te te 're aipoto téb za'ra wa'aba mono hã. Niwa dame si'utõrĩ waihu'u õ di. **24** Duréihã ma tô ãhã wasu'u na ãma rob'ui'ééré, 'Re ìhâimana u'âsi mono zadawa wasu'u'wa hã. ãne te rowasu'u:

“Du hã 're wapti'i hã za'ra mono õ ré, te za 're ré za'ra. Duré romnhirãã norĩ hã wẽ nherẽ, te za 're sirãã a'a za'ra. Tane duré dahâiba hã wẽ nherẽ, te za 're dasi'utõrĩ su'u.

25 Tanei õ di, uburé Danhib'apito nhimiroti hã. Pire na te 're hâimana u'âsi. Niwa si'utõrĩ waihu'u õ di za.”

ãne ãma ìrob'ui'ééré hã.

Tawamhã Wanhib'apito wasu'uwẽ na da te 're aipo're pu'u za'ra wa'aba mono wamhã, ma tô uburé Danhib'apito nhimiroti wasu'uwẽ na te te aima 're rowasu'u za'ra wa'wa.

2 ¹ Taha wa, te za aiwasédé hã 're írẽme pese za'ra wa'aba mo, dasi'ruiwapari hã, duré dazadawa nhipe hã, duré dahâimanazé tô senai'õ hã, duré danhimarĩ na dasi'ruiwapari hã, duré dasima dawasu'u wasédé hã. ² Ai'uté ipoto té hã tina hâiwa'u zô 're ír'y'ry mono ne, te za Wanhib'apito nhimiroti zô 're ïrob'ruiwapari za'ra wa'aba mo, ãma 're asiptete za'ra wa'aba mono da, aihâimana wasété hawi asõ'reptuzé hã 'râwi oto asina 're waihu'u za'ra wa'aba mono da. ³ Wanhib'apito dama 're ïsõpru mono zé hã 'râwi asina 're waihu'u za'ra wa'aba mono wa, wa ãne aima waihu'u za'ra wa'wa.

Ëtẽ na Cristuhu ãma te te ãma ïsimir'ézé wasu'u

⁴ Ma'ãpé, Wanhib'apito u asimirosa'rata na si nherẽ, 're aihutu aba mono. Ta hã wẽ nherẽ, ma tô dasiwi wẽ'õ ni, ãne hã 'ri'wa norĩ te te siwi ïwẽ'õ ne. Tane nherẽ, da te dasiwi wẽ'õ nherẽ, 'Re ïhâimana u'âsi mono ma, wẽ uptabi di, Wanhib'apito hã. Tãma sawi uptabi di duré. ⁵ Ëne ahâ nherẽ, 'ri hã da te dasiwi ãma ï'ri ne, te za 'Re ïhâimana u'âsi mono hã te te aima 're nharĩ za'ra wa'wa, ïsõrõwa na tãma 're aihâimana u'âsi za'ra wa'aba mono da. E marĩ da. ïsõrõwa ãma tãma ïromhuri'wa norĩ ne, sasedoti norĩ ne, tãma ïromhuri'wa 're aihâimana za'ra wa'aba mono da, duré aihâiba na tãma 're asõprub za'ra wa'aba mono da. Zezu Cristu wazada ïdâ'ázéb zarina, tãma 're asõprub za'ra wa'aba mono wamhã, Wamama ma wẽ di, tãma 're ïasõprub za'ra wa'aba mono zé hã. ⁶ Duréihã ïwana ré 'Re ïhâimana u'âsi mono, ma tô ëtẽ na Zezu Cristuhu ãma simir'é. ãne te tinha:

“Ëtẽ tõmo wawẽ hã wa tô pisutu, ïnhorõwa ãma te hiri da, Si'ã na 'ri nho'õmo nhisi ãma. 'Ri na'rata wẽ'ézéb ãma wa za tihi, 'ri hã siptete na sab da. Ëne hã ïma wẽ uptabi di. ïma sawi uptabi di duré. Taha umnhasi sina 're dahâimana za'ra mono wamhã, ïwẽ na za te te dama ãma 're a'uwaimrami u'âsi mono wa, dawĩ 're robzei'õ za'ra mono õ di za.”

ãne ãma ïrob'ui'ére hã, ïbaihã na hã.

⁷ Ëtẽ na ïsisi hã aima sawi uptabi za'ra wa'aba di, Cristu hã, Danho'reptui'wa na asina 're umnhasi za'ra wa'aba mono wa. Da te dasina 're ï'umnhasi za'ra mono õ norĩ ãma, ma tô 'ri'wa norĩ ãma simir'é, 'Re ïhâimana u'âsi mono zadawa wasu'u'wa hã. ãne te ta norĩ ãma rowasu'u:

“Ëtẽ tomhãpã wẽ hã 'ri na'ratazéb da hã, wẽ uptabi nherẽ, wasété newa, 'ri'wa norĩ te te aré siwi ïwẽ'õ hã 'ri na'rata uparizéb da, te oto 're sa'wari u'âsi, pire na.”

Ãne ãwasu'u na rob'ui'ééré hã. **8** Duré êtê tōmo wawě wasu'u amo na rob'ui'ééré hã, ãne:

“Ène hã te za nasi da'marõpãrĩ za'ra.”

Taha na rob'ui'ééré hã, ãne. Ène te te nasi da'marõpãrĩ za'ra wamhã, dama 're rowě za'ra mono õ di za. Tane Cristuhu wasu'uwě hã da te 're saze za'ra mono õ wamhã, dama 're rowě za'ra mono õ di za, 'Re ãhãimana u'ãsi mono hã te te siwi 're ãda'awě'õ mono zéb zarina.

9 Tanei õ di, a norĩ wa'wa hã. 'Re ãhãimana u'ãsi mono, ma tō sima aipisutu za'ra wa'wa, ãsib'a'uwě si oto 're anomro aba mono da. Sasedoti norĩ hã te te sima 're ã'apisutu mono ne, te oto a norĩ wa'wa hã uburé Danhib'apito ma romhuri'wa, 're anomro aba mo, õhõ ãma si 're anomro aba mono da, ãte da. Ta hã robra hawi ma tō rowa'a u sitēme asō tihãrã za'ra wa'wa, 're anomro wasété aba mono zém hawi, rowě uptabi na si 're anomro aba mono da oto. Taha wasu'u na, tiwaihu'u pese na te te aima ãma 're ã'uwaimrami wě za'ra wa'aba mono zém na, ma tō sima aipisutu za'ra wa'wa, ãma 're dapo're pu'u u'ãsi za'ra wa'aba mono da. **10** A norĩ wa'wa hã 'Re ãhãimana u'ãsi mono nhib'a'uwě 're anomro aba mono õ di aré. ãhãna te oto ãsib'a'uwě tãma 're aihãimana za'ra wa'aba mo. Duré da'ãma 're ãpě'ézé mono zé hã asina 're waihu'u za'ra wa'aba mono õ di aré. ãhãna ma tō oto asina ãwaihu'u za'ra wa'wa, da'ãma 're ãpě'ézé mono zé hã.

Dahãimana wě zém na rowasu'u

11 ãsisãnawã norĩ, ãma asawi pese za'ra wa'aba norĩ hã, darom nhiti 're ãdahãimana za'ra mono ne, te 're aihãimana za'ra wa'aba mo, ti'ab ré. Taha wa, marĩ wasété na 'rãwi asima 're rosa'rata za'ra wa'aba mono õ di za, asimirosa'rata wasété zarina 're 'manharĩ za'ra wa'aba mono tō da, aiwasété 'wa hã. **12** A norĩ wa'wa hã Wanhib'apito zazei'õ'wa norĩ wazari, te 're aihãimana za'ra wa'aba mo. Taha wa, te za aihãimana wě na si dama 're aihãimana za'ra wa'aba mo. Tawamhã aihãimana wasété na, taré da te aima 're nharĩ za'ra wa'aba mono nherě, te za da te 're aiwaihu'u za'ra wa'wa, dama 're aihãimana wě za'ra wa'aba mono zém na. Tawamhã Cristu hã apã wei morĩ wapsi, te za 'Re ãhãimana u'ãsi mono ãma tawata za'ra ni, ãsimiroti zarina aihãimana wě na, dama 're aihãimana za'ra wa'aba mono wa.

13 Wanhib'apito nhib'a'uwě oto 're anomro aba mono wa, uburé dama ãpire norĩ nhimiroti hã te za 're ãwapari pese za'ra wa'aba mo. Taha wa, ti'ai ãma danhipai u da'madã'ã'wa nhimiroti hã te za duré 're ãwapari pese za'ra wa'aba mo. **14** Duré tãma da'madã'ã'wa da, te te 're ãda'apisutu mono norĩ nhimiroti zama, te za 're ãwapari pese za'ra wa'aba mo. ãhãimana wasété norĩ hã, ãsadawa para te te 're hã

za'ra mono da, duré ìhâimana wê norĩ âma 're wata za'ra mono da, taha da, ma tô ta norĩ hã pisutu za'ra. **15** 'Re ìhâimana u'âsi mono hã ma tô sima aiwê za'ra wa'wa, aihâimana wê na dama 're aihâimana za'ra wa'aba mono da. E marĩ da. Aihâimana wê na dama 're aihâimana za'ra wa'aba mono nherê, taré da te aima 're nharĩ wasété za'ra wa'aba mono tõe da. **16** Pawa'âbâ âna dama romhuri'wa norĩ ne, robzei'õ na 're aihâimana za'ra wa'aba mono õ di oto, a norĩ wa'wa hã. Tane nherê, Cristuhu âma rowê na 're anomro aba mono nherê, âne taré 'râwi asi'âma 're rosa'rata za'ra wa'aba mono õ di za: Ìwasédé te 're 'manharĩ mono nherê, rowê u'âsi wa za 're ìhâimana. Âne taré 'râwi asi'âma 're rosa'rata za'ra wa'aba mono õ di za. 'Re ìhâimana u'âsi mono ma romhuri'wa, 're aihâimana za'ra wa'aba mono wa, te za aihâimana wê na 're aihâimana za'ra wa'aba mo. **17** Âne wa, te za dahâiba mono bâ 're ìdahâiba wazéb za'ra wa'aba mo. Uburé asiré ìsazei'wa norĩ hã te za 're ìsawi pese za'ra wa'aba mo. 'Re ìhâimana u'âsi mono hã te za duré asima 're ìpipa za'ra wa'aba mo, ìwaihu'u pese uptabi na. Duré ti'ai âma danhipai u da'madâ'â'wa hã te za asiwi 're ìhâiba wazéb za'ra wa'aba mo.

**Pawa'âbâ õ nherê, romhuri'wa norĩ hã 're ìnomro
wê mono zé wasu'u**

18 Aiwada'uri zarina aipawa'âbâ âna dama romhuri'wa norĩ, asib'apito nhimiwada'urizé hã te za 're ìwapari pese za'ra wa'aba mo, ìsimizawi pese norĩ mreme hã, duré ìsimizawi'õ norĩ mreme zama. **19** Taré nherê, da te aima 're rob'manharĩ za'ra wa'aba mono wamhã, te za 're ìrobzépata za'ra wa'aba mo. Âne wamhã, ari'iwu te za 're aihâimana za'ra wa'aba mo, taha da, te te sima 're aiwê za'ra wa'aba mono wa, 'Re ìhâimana u'âsi mono hã. Âne zarina te za te te 're aiwêsãmri za'ra wa'wa. **20** Marĩ hã 're 'manharĩ wasété za'ra wa'aba mono wa, da te 're aihã za'ra wa'aba mono wamhã, ari'iwu 're aihâimana za'ra wa'aba mono nherê, e te za ai'âma 're dawata za'ra wa'wa. Mare di. Aihâimana wê na dama 're aihâimana za'ra wa'aba mono nherê, da te aima 're rob'manharĩ za'ra wa'aba mono wamhã, ari'iwu te za 're ìsépata za'ra wa'aba mo. Tawamhã, 'Re ìhâimana u'âsi mono si te za te te 're aiwêsãmri za'ra wa'wa. **21** Cristu hã ma tô robzépata, asada za'ra wa'aba. Ta hã ma tô âne na aima âma asanho za'ra wa'wa, ìsirã zarina si ari'iwu 're robzépata za'ra wa'aba mono da. Taha da, ma tô sitême asô tihârã za'ra wa'wa, 'Re ìhâimana u'âsi mono hã. **22** Cristu hã marĩ na tiwasédé te te 'manharĩ õ uptabi di. Tô sena na te te dama 're rowasu'u mono wa, sadawa nhipese na da te 're wapari mono õ di, dasiwi. **23** Da te tâma 're nharĩ wasété za'ra mono nherê, asa te te dama âma 're

nharĩ wasété mono õ di. Duré da te tãma ãrob'manharĩ wasété mono na te te robzépata mono nherẽ, te te dama ropipa õ di asa. 'Re ãhãimana u'ãsi mono ma si, ma tã sisõ, taha si dahãimanazéb zarina da'ãma rowairébé'wai wa, te te ãma dama 're a'upai mono õ wa. **24** Cristu hã wedepo'o nnonhi'rãmi na dâ'ã wamhã, ma tã wawasété wa, wawa'ãbã za'ra, wawasédé hã wa te oto 're 'manharĩ tã za'ra mono da, wahãimana wẽ na si oto 're wahãimana za'ra mono da. ãhãiba na da te tãma ãrob'manharĩ wasétézém na, ma tã robzépata za'ëtẽ. Taha zarina, a norĩ wa'wa hã rowẽ na te oto 're aihãimana za'ra wa'aba mo. **25** Rowẽ na 're aihãimana za'ra wa'aba mono õ di aré, pone'ërebã, bãdãdi nhiti 're ãsipa za'ra mono ne, 're anomro aba mono wa aré. ãhãna ma tã apã aipizari za'ra wa'wa, Da'madãhã wẽ 'wai u, ãsarina si oto 're anomro aba mono da, rowẽ na.

Damro ré norĩ hãimanazé wasu'u

3 ¹⁻² Pi'õ norĩ, romhuri'wa norĩ hã tinhib'apito mreme te te 're ãwapari pese za'ra mono ne, te za duré aimro mreme hã 're ãwapari pese za'ra wa'aba mo. ãté aimro za'ra wa'wa hã zahadu te te saze za'ra õ di, 'Re ãhãimana u'ãsi mono nhimiroti hã. Tane nherẽ, tãma 're aihãimana wẽ za'ra wa'aba mono zéb zarina, te za oto sima wẽ za'ra, Cristuhu zazei'wa oto 're hãimana za'ra mono da. Te te 're saze za'ra mono da, tãma 're roti za'ra wa'aba mono õ nherẽ, te za uihã na te te 're saze za'ra. E marĩ wa. Tãma 're aihãimana wẽ za'ra wa'aba mono wa, duré ãmreme hã 're wapari pese za'ra wa'aba mono wa. ³⁻⁴ Asima 're asipese za'ra wa'aba mono na si, 're asõpré wa'aba mono õ di za, ai'rãi waipo ãwẽ na, duré asõ'rebzu ãwẽ na. Duré ai'uza ãwẽ na 're rosa'rata za'ra wa'aba mono õ di za. Asimirosa'rata wẽ na oto 're ãanomro aba mono zéb zõ si, te za asima 're asõpré wa'aba mo, duré aiwaimri 're ãaihãimana za'ra wa'aba mono zéb zõ zama. ãne si tãma wẽ uptabi di, 'Re ãhãimana u'ãsi mono ma hã. **5** ãne si ma tã wahi'rata sipi'õ norĩ hã 're nomro, 're ãhãimana wẽ za'ra mono norĩ hã. 'Re ãhãimana u'ãsi mono si, ma tã ta norĩ hã te te sina 're umnhasi za'ra, te te 're pawapto wẽ za'ra mono da. 'Re ãnomro wẽ mono na, ma tã duré ta norĩ hã sina 're sõpré. Taha wa, ma tã timro mreme si te te 're wapari pese za'ra. **6** ãne Sara hã ma tã 're mo. Timro mreme hã ma tã te te 're wapari pese, Abra'ãhã mreme hã. Taha wa, ma tã tinhib'apito na te te 're sisi Sara hã, Abra'ã hã. Tane te za duré a norĩ wa'wa hã aimro ma 're aihãimana wẽ za'ra wa'aba mo. Asina aihãtãã ãna, te za duré 're anomro aba mo. Tawamhã Saraha nhihudu na te za te te 're asisi za'ra wa'wa, 'Re ãhãimana u'ãsi mono hã.

7 Duré aibã norĩ, aimro siré te oto 're aihãimana za'ra wa'aba mo. A norĩ wa'wa hã aibã wa, aihãiba hã siptete za'ra wa'aba di, aimro hãiba za'ra wa'aba ma hã. ãne hã te za asina ãwaihu'u za'ra wa'wa.

Taha wa, te za aimro ma 're aihâimana wê za'ra wa'aba mo. Rowê ïsi'utôri'ô hã te za 'Re ïhâimana u'âsi mono hã aima sômri za'ra wa'wa, hâiwa âma. Aimro nori wa'aba ma zama, te za sômri za'ra. Taha wa, te za aimro ma 're aihâimana wê za'ra wa'aba mo. Tawamhã 'Re ïhâimana u'âsi mono ma, asiré 're aimreme zusi aba mono wamhã, te za te te 're ai'awapari 'wa, Wamama hã.

**Ïsazei'wa nori, dama 're hâimana wê za'ra mono nherê,
te te 're ïrobzépata za'ra mono zé wasu'u**

⁸ Ìmreme na wa za oto aima 'rãsutu za'ra wa'wa. Asimirosa'rata wê na te za aihîni 're asisazei pese za'ra wa'aba mo. Duré dapê'ézé zarina da te 're robzépata za'ra mono wamhã, te za dasiré aipê hã 're ïsépata za'ra wa'aba mo, aipê'ézé sina. Duré uburé marî wê na dama 're rowê za'ra mono wa, 're dato za'ra mono wamhã, te za dasiré 're ato za'ra wa'aba mo. Te za duré 're asisawi pese za'ra wa'aba mo. Asima aipire na 're aihâimana za'ra wa'aba mono ô di za. ⁹ Duré asada 're dahâimana wasété za'ra wa'aba mono wamhã, asa dama âma 're wa'râmi za'ra wa'aba mono ô di za, aihâimana wasété na. Duré dapê'ê na taré da te 're ai'ruiwapari za'ra wa'aba mono wa, da te aima 're nharî za'ra wa'aba mono nherê, asa dama âma 're wa'râmi za'ra wa'aba mono ô di za, aimreme wasété na hã. Wamama wi si, te za ta nori ma 're ïwaptêrê za'ra wa'aba mo, ïwê si te te tâma 're sômri za'ra mono da, ta nori ma. Âne da, ma tô Wamama hã sitême asô tihârâ za'ra wa'wa, ïwê na si aima 're sôprub za'ra wa'aba mono da. ¹⁰ Duréihã âne na ma tô 'Re ïhâimana u'âsi mono zadawa wasu'u'wa hã dama roti:

“Aihâiba ré ré, robzei u'âsi 're anomro aba mono da, asima 're wê za'ra wa'aba mono wamhã, aimreme wasété na dama 're nharî za'ra wa'aba mono ô di za. Duré dama 're asadawa nhipese za'ra wa'aba mono ô di za.

¹¹ Te za duré aiwasété wi 're aipizari za'ra wa'aba mo, ïwê si dama 're 'manharî za'ra wa'aba mono da oto. Duré rowê na si asiré 're aihâimana za'ra wa'aba mono da si, te za asina 're ïrosa'rata pese za'ra wa'aba mo.

¹² Hâimana wê na dama 're ïhâimana za'ra mono nori si, te za te te 're ab'madâ'â pese, 'Re ïhâimana u'âsi mono hã. Te te duré tiwi 're rowaptêrê za'ra mono wamhã, te za te te 're awapari, ïmreme zarina te te tâma âma 're a'uwaimrami mono da. Tane nherê, dahâimana wasété na dama 're dahâimana za'ra mono wamhã, te za dazada 're hâimana.”

Âne âma ïrob'ui'ére hã, ïbaihã na hã.

¹³ A nori wa'wa hã 're anomro wê wa'aba mono da, tô sena asina 're rosa'rata za'ra wa'aba mono wamhã, e 'wa hã te za rowasédé hã

te te aima 're 'manharĩ za'ra wa'wa. **14** Tane nherẽ, dama 're aihâimana wẽ za'ra wa'aba mono nherẽ, taré da te aima 're rob'manharĩ wasété za'ra wa'aba mono wamhã, dama 're aipahi za'ra wa'aba mono õ di za. Asimirosa'rata na 're aihâtââ za'ra wa'aba mono õ di za duré. **15** Cristu hã Asib'apito aima 're hâimana za'ra wa'aba mono wa, te za aihâimana prédup sina 're ïwapari pese za'ra wa'aba mo. Duré Cristu 're ïsaze za'ra wa'aba mono zém na, da te 're asadanharĩ za'ra wa'aba mono wamhã, awa'awi te za dama 're asiwasu'u waré za'ra wa'aba mo. **16** Aiwaimri te za 're asiwasu'u za'ra wa'aba mo, aimreme wasété ãna. Aihâimana wẽ na te za dama 're aihâimana za'ra wa'aba mo, asimirosa'rata wasété na râwi 're asiwẽ'õ za'ra wa'aba mono tõ da. Tawamhã dama 're aihâimana wẽ za'ra wa'aba mono wamhã, Cristuhu zazei'wa 're aihâimana za'ra wa'aba mono 'ru te, taré da te aima 're nharĩ wasété za'ra wa'aba mono nherẽ, te za damreme niwĩ 're danhiséb za'ra. **17** Âté 're aihâimana wẽ za'ra wa'aba mono 'ru te, te za da te aima 're rob'manharĩ wasété za'ra wa'wa. ãne zarina, 're robzépata za'ra wa'aba mono wamhã, te za ïwaihu'u za'ra wa'wa, 'Re ïhâimana u'âsi mono te te sima 're aiwẽ za'ra wa'aba mono zéb zarina, a'â 're ïrobzépata za'ra wa'aba mono na. ãne hã te te wama 're awẽ mono õ di, dama 're ïwahâimana wasété za'ra mono zéb da hã. Dama 're wahâimana wasété za'ra mono wamhã, âté te za da te 're wahâ za'ra. ãne zarina, wa te 're robzépata za'ra mono wamhã, ï'uwaibaba wa za tô wa te 're robzépata za'ra. **18** Misi haré ma tô Cristu hã dazada dêrâ, 're ïdahâimana wasété za'ra mono hawi, te te 're da'anho'reptui mono da. 'Re ïmorĩ wẽ uptabi hã ma tô dêrâ, 're ïdanomro wasété mono norĩ da, te te 're wa'anhimroi mono da, 'Re ïhâimana u'âsi mono u. Cristu hã dêâ uptabi nherẽ, ma tô ïmama hã hâiwa'utu, apâ 're hâimana u'âsi mono da. **19** Tihâiba na u'âsi, te adââ norĩ u mo, dazazéb 're, 're ïdasimasa mono ne, nimomo 're ïwairébé mono õ norĩ u. Uburé Danhib'apito uptabi na te te sina po're pu'u za'ra da, te ïtème timorĩ za'ra. **20** Ta norĩ hã Nowé ti'ai ãma 're morĩ ré, te te 're wapari za'ra mono õ di, 'Re ïhâimana u'âsi mono nhimiroti hã. Nowé hã 'ri ne uba're, te te 'manharĩ ré, te ta norĩ hã po're ãna 're nomro. Tane nherẽ, da'ãma wa'a su'u õ wa, te te da'uprosi su'u õ di, 'Re ïhâimana u'âsi mono hã. Te te oto da'uprosi wamhã, 'ri ne uba're wa, ïsisisi norĩ si, ma â wi sõ'reptu za'ra. Ta norĩ hã umro za'ra di. **8** na ïhâiba za'ra hã. **21** Ta hã â hã, â dawabzuri, te wasu'u, danho'reptuzé. E da'u're wa, da'upsözé, te â dawabzuri hã wasu'u. Mare di. 'Re ïhâimana u'âsi mono ma, da te dasi'ãma 're ïropisutu za'ra mono zé te wasu'u, â dawabzuri hã. Dawasédé te te dama 're apari mono wa, 'râwi 're dasiwaihu'u za'ra mono õ di oto, dawasété na hã. Taha wa, dama 're ïrowẽ za'ra mono zéb zarina, te za oto

dasina da te tãma 're ropisutu za'ra, ãma 're ïdanomro mono zéb da hã. Zezu Cristu hã dâ'â uptabi nherê, Ìmama hã ab're hawi te te hãiwa'utu wa, apâ 're morĩ wa, te asõ'reptuzé hã aima tihâimana za'ra wa'wa. ²² Cristu hã hãiwa u morĩ wa, te oto pire na Timama nhimire niwĩ 're sãmra, Danho'reptui'wa hã. 'Re ïhâimana u'âsi mono ma romhuri'wa norĩ 'madâ'â'wa, te 're hâimana. Uburé hãiwa nho're ãma, pire na duré waihu'u pese na 're ïhâimana za'ra mono norĩ ma zama, te pire uptabi na tãma 're hâimana za'ra.

'Re ïdanomro mono zép tém na rowasu'u

4 ¹ Cristu hã ma tô tihâiba na robzépata. Taha wa, te za asina 're asiptete za'ra wa'aba mo, asihâiba zawi ãna, ïsine 're ïrobzépata za'ra wa'aba mono zéb da hã. ãne, da te 're robzépata za'ra mono wamhã, marĩ, da te 're ïmanharĩ wasété za'ra mono zé hã, te za oto da te 're rême pese za'ra. ² Taha wa, ti'ai ãma 're aihâimana za'ra wa'aba mono ré, te za 're aihâimana wẽ za'ra wa'aba mo, 'Re ïhâimana u'âsi mono te te sima 're ïwẽ mono zéb zarina si. Duré marĩ na asima 're ïrosa'rata wasété za'ra wa'aba mono zéb zarina, 're aihâimana za'ra wa'aba mono õ di za oto. ³ Wahub ahâ na ma tô ai'ãma 're si'utõrĩ za'ra wa'wa, 'Re ïhâimana u'âsi mono nhimiroti waihu'u'õ'wai hâimanazém na, 're aihâimana wasété za'ra wa'aba mono ré. Ma tô asisõ 're ïrowasutu za'ra wa'aba mo aré. Âzézei'wa te aré 're anomro aba mo. Duré dato ïwẽ'õre hã 're 'manharĩ za'ra wa'aba mono ré, ma tô asina 're asipsaihuri za'ra wa'aba mo aré. Duré âzézei'wa 're aihâimana za'ra wa'aba mono wa, ma tô ai'rã siwamnarĩ na 're aihâimana za'ra wa'aba mo. Duré 'Re ïhâimana u'âsi mono upana, ma tô romhâiba 'manharĩ ãma 're aiwata za'ra wa'aba mo, ta hã waihu'u pese newa rob'manharĩ hã. ⁴ 'Re anomro wasété aba mono zé hã, tâibã oto. Taha wa, siwa'ru dasiré 're aihâimana za'ra wa'aba mono õ wa, te ai'ãma 're tob'uzu za'ra wa'wa, Wamama nhimiroti waihu'u'õ'wa norĩ hã. Taha wa, 're aihâimana wẽ za'ra wa'aba mono 'ru te, te oto ta norĩ hã taré te te aima 're nharĩ wasété za'ra wa'wa. ⁵ Tane nherê, nimahã na ta norĩ hã 're ïhâimana wasété za'ra mono zém na te te ïwaihu'u za'ra zéb zarina, te za ta norĩ ma rowairébé za'ra, 'Re ïhâimana u'âsi mono hã. Ta hã te te ïda'awaihu'uzéb zarina, te za romhutu na uburé norĩ ma rowairébé, ïhâiba ré norĩ ma, 're ïdâ'â za'ra mono norĩ ma zama. ⁶ Taha wa, dahâimanazém na za te te dama 're arowairébé mono wa, ma tô Wanhib'apito zadawa wasu'u'wa norĩ hã Cristuhu wasu'uwẽ na te te 're dapo're pu'u za'ra, da te ãma 're saze za'ra mono da. Ta norĩ wapari'wa norĩ hã ma tô oto tidâ'â za'ra. Ti'ai ãma 're nomro mono ré, ma tô ïwasété na wẽ'õ za'ra, 'Re ïhâimana u'âsi mono hã, uburé 're ïdahâimana za'ra mono norĩ hã ïwasété na te te

're ĩ'awē'ō mono ne. Tane nherē, hâiba ré 're nomro mono ré, ma tô Wanhib'apito zadawa wasu'u'wa norĩ hã Cristuhu wasu'u'wē na po're pu'u za'ra, ta norĩ hã rowē ĩsi'utōrĩ'ō âma 're hâimana u'âsi za'ra mono da, 'Re ĩhâimana u'âsi mono ne.

'Re dasipawaptob za'ra mono da, dama ĩrotizé

7 Ro ĩsi'utōrĩzéb u hã, romhuture di oto. Taha wa, te za aihâiba na asina 're asiptete za'ra wa'aba mo. Duré aihâimana nhimiza'rese te za 're aihâimana za'ra wa'aba mo, 'Re ĩhâimana u'âsi mono ma, 're aimreme zusi u'âsi aba mono da. 8 Dazawizé wasu'u si, ĩpire uptabi hã. Taha zarina si, 're asisawi pese za'ra wa'aba mono sina, te za 're aihâimana za'ra wa'aba mo. E marĩ da. Dazawizé hã aima 're hâimana za'ra wa'aba mono wa, dawasédé hã da'âma 're 'madââ za'ra wa'aba mono tō da, ahâ nherē, da te 're 'manharĩ za'ra mono nherē, dawasédé hã. 9 Te za duré 're ĩda'mazasi su'u za'ra wa'aba mo ari'iwi, 're dawata'ē za'ra wa'aba mono âna. 10 'Re ĩhâimana u'âsi mono hã sōpru wa, ma tô aihâiba mono bâ dama 're ĩromhuri za'ra wa'aba mono zéb da hã, aima sōmri za'ra wa'wa, sipu'u pese na. Taha zarina si, te za oto dama âma 're ĩ'uwaimrami za'ra wa'aba mo. 11 Tawamhã dama 're rowahutu za'ra wa'aba mono wamhã, duré dama 're roti za'ra wa'aba mono wamhã, timreme te te aima 're ĩsōmri za'ra wa'aba mono na si, te za dama 're ĩrowasu'u za'ra wa'aba mo. Duré aihâiba na zama 're dapawaptob za'ra wa'aba mono wamhã, 'Re ĩhâimana u'âsi mono, tinhiptede te te aima 're ĩsōmri za'ra wa'aba mono na, te za 're ĩdapawaptob za'ra wa'aba mo. Âne na hã te za dama âma 're ĩ'uwaimrami za'ra wa'aba mo, 'Re ĩhâimana u'âsi mono âma 're dawata za'ra mono da, Zezu Cristuhu nhib'a'uwē 're aihâimana za'ra wa'aba mono wa, dama âma 're ĩ'uwaimrami za'ra wa'aba mono zém na. 'Re ĩhâimana u'âsi mono hã wē uptabi wa, duré waihu'u pese uptabi wa, wa za âma 're wawata u'âsi za'ra.

Wanhib'apito zazei'wa norĩ te te 're ĩrobzépata za'ra mono zé wasu'u

12 ĩsiwadi norĩ, ĩma asawi pese za'ra wa'aba norĩ hã, âhâna rowasédé hã da te aima 're 'manharĩ za'ētē za'ra wa'aba mono wa, te a'â 're ĩrobzépata za'ra wa'aba mo. Tane nherē, 're ĩrobzépata za'ra wa'aba mono zém na âma 're atob'uzu za'ra wa'aba mono õ di za, da te aima 're rob'manharĩ za'ētē za'ra wa'aba mono õ newa. 13 Cristu hã aiwana za'ra wa'aba, ma tô robzépata za'ētē. Taha wa, ĩsine 're robzépata za'ra wa'aba mono wa, te za aipē'ē 're, 're ato za'ra wa'aba mo. E marĩ wa. Cristu hã tiwaihu'u pese na apâ wei morĩ wapsi, za ato za'ēne hã aima 're hâimana za'ra wa'aba mono

wa. 14 Áté Cristuhu ãma si 're aihâimana za'ra wa'aba mono 'ru te, te za da te aima 're nharĩ wasété za'ra wa'wa. Tane nherẽ, aima 're rowẽ za'ra wa'aba mono di za. E marĩ wa. 'Re ãhâimana u'âsi mono pẽžzani hã aipẽ'ẽ 're aima 're hâimana za'ra wa'aba mono wa oto, rowẽ uptabi zé hã. 15-16 Cristuhu zazei'wa oto 're anomro aba mono nherẽ, 're danhimroi wa'aba mono õ di za. Duré marĩ na dawĩ 're asipsaihuri za'ra wa'aba mono õ di za. Duré marĩ na dawĩ 're ro'wa'rutu za'ra wa'aba mono õ di za. Duré danhimirosa'rada hã dawĩ 're 'wa'rutu za'ra wa'aba mono õ di za. Áté nimahã na dama 're aihâimana wasété za'ra wa'aba mono wamhã, te za da te aima 're rob'manharĩ wasété za'ra wa'wa. ãne zarina, 're robzépata za'ra wa'aba mono wamhã, ĩ'uwaibaba te za tô 're ĩrobzépata za'ra wa'aba mo. Tane nherẽ, Cristuhu zazei'wa 're anomro aba mono 'ru te, 're robzépata za'ra wa'aba mono wamhã, 're aséb za'ra wa'aba mono õ di za. Cristuhu zazei'wa na, da te 're asisi za'ra wa'aba mono wẽ te, te za 'Re ãhâimana u'âsi mono ãma si 're aiwata za'ra wa'aba mo.

17 Bâdâ hã ma tô oto ĩwa waptãrã, 'Re ãhâimana u'âsi mono hã te te dama ĩ'arowairébézéb da hã, ta hã dahâimanazém na dawaihu'u'wa 're hâimana mono wa. Taha wa, te za a'â tinhib'a'u'wẽ norĩ ma arowairébé, 're ĩwahâimana za'ra mono zém na, te te wa'awaihu'u wa. Tawamhã e niha za ĩsazei'õ'wa norĩ ma te te ĩrowairébézé hã. Wanhib'apito wasu'u'wẽ na, 'Re ãhâimana u'âsi mono, we te te dama ĩwaihu hã te te ãma saze za'ra õ wa dame, ta norĩ ma, 're rowẽ za'ra mono õ di za.

18 Duréihã ãhã wasu'u na ma tô ãne na dama rowasu'u, 'Re ãhâimana u'âsi mono zadawa wasu'u'wa hã:

“Áté marĩ ahã na te za sada 're hâimana za'ra, 're ĩnomro wẽ mono norĩ zada hã, tino'reptuzé hã te te sina 're uwaimrami za'ra mono õ ré. Tawamhã e niha te za tãma 're romhâimana za'ra, 'Re ãhâimana u'âsi mono wẽ'õ'wa norĩ ma hã, siwa'ru 're ãhâimana za'ra mono norĩ ma hã.”

ãne ta norĩ wasu'u na rob'ui'ére hã, ĩbaihã na hã.

19 Áté wa za a'â robzépada hã wa te wasina 're 'madâ'â za'ra, 'Re ãhâimana u'âsi mono te te wama 're ĩ'awẽ mono zéb zarina. Tane nherẽ, 'Re ãhâimana u'âsi mono, wa'apoto mono 'wai umnhasi sina, wa za dama 're wahâimana wẽ za'ra, ta hã tinhimiropisutu wẽ na za te te wama ãma 're a'u'waimrami u'âsi mono wa.

Wanhib'apito zazei'wa 'madâ'â'wa norĩ ma rowasu'u

5 1 Da'madâ'â'wa norĩ, ãhãna wa za aima ĩsiwasu'u za'ra wa'wa. Wa hã da'madâ'â'wa, wa duré 're ãhâimana. Cristu hã te te robzépata wamhã, wa tô ĩtõmo na 'madâ, te te ĩrobzépatazé hã. Wa hã wa za

duré ãsazei'wa norĩ siré, rowẽ uptabi hã ãsina waihu'u hãiwa ãma, rowẽ uptabi hã sô'awi te te wama pisutu za'ra wapsi, Wanhib'apito hã. **2** Taha wa, wa za aima waihu'u za'ra wa'wa, 'Re ãhãimana u'ãsi mono hã tinhib'a'uwẽ te te aima 're ãpisutu za'ra wa'aba mono hã ato sina tãma 're pawaptob za'ra wa'aba mono da, tãma 're aiwa'a za'ra wa'aba mono ãna. ãne da, ma tô sima aiwẽ za'ra wa'wa, Wamama hã. Rob'uiprazéb zô tãma 're dapawaptob za'ra wa'aba mono õ di za. Tô sena asima 're ãwẽ uptabi za'ra wa'aba mono zéb zarina si, te za tãma 're ãdapawaptob za'ra wa'aba mo. **3** Asimi'madã'ã za'ra wa'wa hã tãma 're 'madã'ã pese za'ra wa'aba mono da, ma tô aipisutu za'ra wa'wa, 'Re ãhãimana u'ãsi mono hã. Taha wa, a norĩ wa'wa hã dama aipire wẽ te, 're dawada'uri za'ra wa'aba mono õ di za. Asimipawapto wẽ na te za tãma ãma 're asanho wẽ za'ra wa'aba mo, asimi'madã'ã za'ra wa'aba norĩ ma. **4** Tawamhã Da'madã'ã'wai uptabi hã apã wei morĩ wapsi, tãma 're ãdapawapto wẽ za'ra wa'aba mono zé wa'rãmi, te za oto aima wa'ãbã za'ra wa'wa, ãwẽ uptabi na, ãsi'utõrĩ'õ na oto aima 're hãimana u'ãsi za'ra wa'aba mono da.


5 ãpréduptém norĩ, ãprédum norĩ mreme si te za 're ãwapari pese za'ra wa'aba mo. ãsazei'wa norĩ, aihĩni te za romhuri na 're asipawaptob za'ra wa'aba mo, aipire na 're asi'madã'ã za'ra wa'aba mono ãna. Duréihã ãne na ma tô rob'ui'éré, 'Re ãhãimana u'ãsi mono zadawa wasu'u'wa hã:

“Dapire na 'rãwi 're ãdasi'madã'ã za'ra mono norĩ da si, te za 're hãimana, 'Re ãhãimana u'ãsi mono hã. Dapire na 'rãwi da te dasi'ãma 're ãrosa'rata za'ra mono õ norĩ si, te za te te 're apawaptob u'ãsi.”

ãne ãma rob'ui'éré hã, ãbaihã na hã.

6 ãhã wa, te za Wamama ma 'rãwi aiwapu na 're asi'madã'ã za'ra wa'aba mo, taha si waihu'u pese uptabi na 're hãimana mono wa. ãne wamhã, bãdã te te ai'ãma sima ãpisutuzém na, te za ai'ãma uwaimrami za'ra wa'wa, aipire na oto dama 're aihãimana za'ra wa'aba mono zéb da hã. **7** 'Re ãhãimana u'ãsi mono hã te te 're ai'madã'ã wẽ za'ra wa'wa. Taha wa, marĩ na 're aihãtã'ã za'ra wa'aba mono wamhã, te za tãma 're asiwasu'u za'ra wa'aba mo, marĩ na 're ãaihãtã'ã za'ra wa'aba mono zéb zarina. Taha parimhã, ãma 're rosa'rata za'ra wa'aba mono õ di za oto, marĩ na 're ãaihãtã'ã za'ra wa'aba mono ãma hã.

8 Ma'ãpé, aihãimana nhimiza'rese sina 're aihãimana za'ra wa'aba mono. Duré 're asi'madã'ã pese za'ra wa'aba mono. E marĩ wa. Da'rui'wa hã datême 're morĩ wa, wa'uburé norĩ nhib'apito hã. Hu'u zéré pa hã wairõ sina, tisa zô 're ãnomro mono ne, te datême 're morĩ u'ã, Wanhib'apito si da te dasina 're ã'madã'ã u'ãsi za'ra mono zé hã te te dawĩ 're a'uprosi mono da. **9** Asiré Wanhib'apito zazei'wa norĩ hã daro mono bã 're hãimana za'ra mono 'ru te, da te tãma 're ãrob'manharĩ



*Hu'u zéré pa
1 Pedru 5.8*

hã te za te te aima ãma 're a'uwaimrami 'wa, 'Re ìhâimana u'âsi mono hã. Taha si te za te te 're asiptete u'âsi za'ra wa'wa, tiwaihu'u pese na, asiptete u'âsi ãma 're aihâimana za'ra wa'aba mono da. Ôhõ ma si te ìsimizawizé hã sa'êtê na tâma 're hâimana. Taha wa, ma tô sitême asô tihârâ za'ra wa'wa, rowê ìsi'utõrĩõ ãma ìsiré 're aihâimana u'âsi za'ra wa'aba mono da, Cristuhu nhib'a'uwê oto 're anomro aba mono wa. ¹¹ 'Re ìhâimana u'âsi mono hã danhipai u dama pire uptabi na 're hâimana mono wa, wa za taha ãma si 're wawata u'âsi za'ra.

za'ra mono zém na, te a'â te te 're robzépata za'ra, asine za'ra wa'aba. ã norĩ wasu'u hã ma tô ìwaihu'u za'ra wa'wa. Taha wa, Wanhib'apito umnhasi sina te za 're aihâimana za'ra wa'aba mo, da'ru'wai wi asina 're asiptete u'âsi za'ra wa'aba mono sina. ¹⁰ Tane nherê, 're robzépata hã za'ra wa'aba mono õ ré, rowêzé

Pedru te te ìdazawizé wasu'u

¹² Sira hã ma tô ìpawapto, aima ìnhimiroti syry za'ra wa'aba nherê, te te aima rob'ui'ére za'ra wa'aba da. Ta hã ìsisânawã ne, te ìma 're hâimana. Taha wa, ìma umnhasi di. Wa hã wa tô ìsima aiwê za'ra wa'wa, ìnhimiroti na te aipawapto za'ra wa'aba da, Wanhib'apito ãma si asiptete sina 're anomro aba mono da, 'Re ìhâimana u'âsi mono nhimipawaptozbé hã asi'uihã na asina 're waihu'u za'ra wa'aba mono da. Taha wasu'u na si, wa tô te aima 're rowasu'u za'ra wa'wa, tô sena wa. Taha wa, te te 're aipawapto wê za'ra wa'aba mono wa, te za asiptete sina ãma 're anomro aba mo.

¹³ Wanhib'apito zazei'wa norĩ hã, Babironiza na 'ri nho'õmo nhisi ãma 're ìhâimana za'ra mono norĩ hã, ma tô Wamama hã sima pisutu za'ra, ìsib'a'uwê oto 're hâimana za'ra mono da. Ta norĩ zama ma tô timreme na ãma asawi za'ra wa'wa. Ì'ra na te 're ìsisi mono zama, ma tô duré timreme na ãma asawi za'ra wa'wa, Marcusi hã. ¹⁴ Tame te za uburé asiré ìsazei'wa 're aihâimana za'ra wa'aba mono wa, asõ'utu na asisawi sina 're asitob'rata hârâ za'ra wa'aba mo.

Cristuhu nhib'a'uwê norĩ, rowê na ãma 're aihâimana za'ra wa'aba mono da si, wa aima za'ra wa'aba te tiwi 're rowaptêrê u'âsi, Wamama wi.